

20. juli 2018. godine

Misija OSCE-a u Bosni i Hercegovini objavljuje:

## **POZIV ZA DOSTAVLJANJE RADOVA**

na temu nastavničkih kompetencija potrebnih za pružanje inkluzivnog i kvalitetnog obrazovanja. Radovi će biti predstavljeni na konferenciji pod nazivom „**Promjenjiva priroda obrazovanja nastavnika – praksa i potrebe u BiH**“, 20. novembra 2018. godine u Zenici, Bosna i Hercegovina.

Misija OSCE-a u Bosni i Hercegovini (Misija) već neko vrijeme pruža podršku obrazovnim vlastima u unapređivanju inkluzivnosti i kvaliteta obrazovanja u BiH. Nadalje, Misija podstiče lidere i zajednice da preduzmu sve promjene neophodne za pružanje savremenog i kvalitetnog obrazovanja svim učenicima u BiH.

U procesu provođenja inkluzivnih i nediskriminatorskih politika, brojni su izazovi u nastavi i učionicama, i zbog toga što se, u većini slučajeva, te politike ne odražavaju u profesionalnom razvoju nastavnika i obrazovanju budućih nastavnika. Stoga Misija zagovara rad na unapređenju sistema profesionalnog razvoja nastavnika s težištem na uvođenju inkluzivnih i nediskriminatorskih politika i praksi. Misija daje podršku nastojanjima za poboljšanje programa za obrazovanje budućih nastavnika, kojima bi bili omogućeni sistemski preduvjeti za unapređenje nastavničkih kompetencija neophodnih za postizanje veće inkluzivnosti u nastavnom procesu i kvalitetu obrazovanja. S tim u vezi, Misija posebnu pažnju poklanja saradnji između obrazovnih vlasti i nastavničkih fakulteta.

U cilju pokretanja diskusije i istraživanja teme ove konferencije: „Promjenjiva priroda obrazovanja nastavnika – praksa i potrebe u BiH“, Misija objavljuje poziv za dostavljanje radova na sljedeće teme i podteme:

### **1) Politike obrazovanja nastavnika u BiH – postojeće i buduće inicijative**

- Kompetencije i standardi nastavničke profesije u BiH
- Obrazovanje budućih nastavnika i razvoj nastavničkih kompetencija
- Sistemi kontinuiranog profesionalnog razvoja i učenja nastavnika

### **2) Obrazovanje nastavnika i promjenjiva priroda njihovog rada – izazovi i mogućnosti**

- Razvoj nastavničkih kompetencija neophodnih za inkluzivno i nediskriminatorsko obrazovanje
- Senzibilitet nastavnika prema različitostima u učionici i njihova uloga u inkluziji marginaliziranih grupa i grupa u nepovoljnom socijalnom položaju

- Saradnja između nastavnika u školama usmjerena ka razvoju inkluzivne i kvalitetne sredine za nastavu i učenje

Radove je potrebno poslati u skladu sa sljedećim pravilima i rokovima.

Rokovi za slanje sažetaka i radova:

12. septembar 2018. godine	Rok za slanje sažetaka radova (do 300 riječi)
18. septembar 2018. godine	Obavijest o izabranim sažecima
20. oktobar 2018. godine	Rok za slanje radova (od 5.000 do 10.000 riječi)
8. novembar 2018. godine	Obavijest o izabranim radovima

Sažetke i radove poslati na jednom od službenih jezika BiH i/ili na engleskom jeziku.

Sažetke i radove će pregledati odbor recenzenata. Izabrani radovi bit će predstavljeni na konferenciji, a potom će ih Misija objaviti na jeziku originala, odnosno na jednom od službenih jezika BiH i na engleskom jeziku.

Troškove učešća odabranih autora na konferenciji snosit će Misija.

Sva dodatna pitanja, kao i sažetke radova (**zajedno s biografijom**) možete poslati na e-mail adresu: [obrazovanje.nastavnika@osce.org](mailto:obrazovanje.nastavnika@osce.org).